

佚存叢書

借
563
35





新念圖書
木村榮市君
贈此書以為
其先考紀念
維時明治三
十九年九月
新念圖書



景文宋公集卷第一百單七

行狀

馮侍講行狀

馮元字道宗年六十三公之先始平人四代祖官廣州唐末關輔亂不敢歸而劉氏據南海僑斷士人故三世食其祿太祖定交廣公之禰本劉氏日御國除始為王官授保章正老病免遂占數都內公少嗜學保章君不欲公疇其業使從故僕射孫宣公授五經大義又友博士崔頤正逮冠彊立博覽外謙謙若不足中敏力甚自經典故訓祖襲師承穿穴筵楹皆能

長安先生集
一
駕其說浸弄翰爲詞章默而有沈鬱之思出入服褒
衣習矩步如大賓祭鄉人化其謹至以俚語諺之不
妄交游惟樂安孫質吳陸參譙夏侯圭相友善三人
皆直諒而材故號四友家貧盛冬無薪燎夜輒市瓶
酒與圭對經研榘一再酌以自溫或達旦不瞑真宗
大中祥符元年由進士調臨江縣尉再朞罷會講員
缺詔令集吏能明經得自言試可公往應令口諫議
大夫謝泌領選精果有風鑒見公儒者嘻笑曰吾聞
古治一經至皓首生能盡善也邪對曰達者一以貫
之可矣謝奇其對因抉經義疑晦者廷問參詰公條

陳詳詣言簡氣愿謝抵掌嗟伏即日聞上授國子監
直講由是名震京師公卿大夫家爭欲屈公授道者
久之遷廷尉平又兼崇文院檢討其八年程覆俊選
公待語殿中帝讀易至泰卦命說其義公旣道繇象
云云因本君臣感會所以輔相財成者帝悅賜五品
服稍親近之禁中建龍圖閣庋藏祕冊置學士待制
等員爲搢紳譽處時帝用尙書工部郎中李虛已兵
部員外郎李行簡待制是時公仕資淺故以太子中
允直閣直閣蓋由公始數召入與二李賜清閒說易
盡上下經帝嘗稱公誦說通而不泥言外自有餘趣

非專門一經士也俄改三品服天禧元年以諫議大夫假節使契丹還遷太常丞兼判禮院吏部南曹先是今上在儲闈帝欲得肅艾長者使之勸學訪於宰相時太尉文正王公以公對或者謂公年差少罷不用更用博陵崔遵度四年遵度卒帝乃擢公左正言兼太子右諭德代其任它職如舊初文正聞公名而未之識一日召至第先使諸子質經義密視其人淹粹亮口乃自見之授其老子它日令詣府與執政衆試已而爲帝言數矣故公之顯文正力焉公由孤生挾儒術進出入十餘年銷玉華綏與諸儒獻歌頌數

得進見兩宮所以褒禮賜予尤渥便蕃光明爲時宗國器當世休之今上嗣位改尙書工部員外郎升爲直學士兼侍講未幾孫宣公亦入靈門執經遞進公得孫同列以爲寵孫得公亦自以知人爲多兩人提衡諷道上益嚮學俄兼會口觀副使知通進銀臺司兼門下封駁事天聖元年判登聞檢院明年判國子監三年禮部郎中五年同知貢舉時天下階計參陪公協力程綜片善必錄雖鉤捶臬平不計其公未幾正爲學士當是時天子念先帝盛烈裁績信書爲一王言故貳卿中山劉公筠今資政殿學士常山宋公

綬丞相穎川陳公同領史事已而丞相爲開封府浩穰劇三輔乃罷史官諸公亟以公請詔從之書閱兩朝論次筆削者衆至是褒懲謹嚴近古風烈矣其十一月燎祭南郊爲鹵簿使七年召入翰林爲學士凡三禁職皆天下選而公兼有且優爲之又判尙書省俄爲三班院歲餘改吏部郎中八年以國書成進諫議大夫充史館修撰九年爲吏部流內銓兼羣牧使明道元年十月旣考室謝享宗廟又爲鹵簿使以赦令例遷給事中明年耕籍田使任如廟禮俄爲莊獻莊懿二太后圍陵鹵簿使前此莊懿之未祔也塋都

城右郊公嘗假鴻臚護其葬及梓宮之遷斥土沮溼近戚詆公監視亡狀十月解翰林學士及侍講二職出守河陽辭得見上但頓首引咎自請治郡滿三年奉計以報會大學官屬叩丞相府上書留公柄臣悔欲弗遣公固願行到部以清靜稱不作條教今左僕射王沂公自洛帥入覲爲上言馮某東朝雋老不宜以纖介弃外上亦意合卽日馳傳詔公景祐二年春二月至自河陽改禮部侍郎兼翰林侍講學士兼知審官院復判太常禮院國子監公旣還朝自以羽翼舊人身託勸講宜出入諷議不苟默而已乃獻金華

五箴弼違告猷詞兼婉切上納其戒優詔答之會上
留意雅樂閱經文殘缺規創大典夏四月詔公領修
樂書俄復爲南郊鹵簿使管祥源觀事明年七月書
成上號其書爲景祐廣樂記特遷戶部賞勞也公素
有蹠齧不堪趨拜四年春病浸劇告未滿三月會小
瘳公自力造朝未幾病復甚氣上選害言語後四月
戊戌終于正寢上聞訃震悼以本曹尙書告其柩賻
錢三十萬絹百匹醪米牽具稱之愍賻之所以優加
君臣之際深矣公之配夫人周氏封臨汝郡無息以
兄之子大理評事諱爲嗣公歿夫人命諱以衰經卽

次於殯東會詔到門問公親屬夫人卽表公遺命詔
可擢諱衛尉寺丞諱子二人釋褐竝爲將作監主簿
卹孤厚終之恩乃如是是其德已侈大哉公自襁巾
至捐館進階及勲各六詔爵五封戶五加而再實其
食如今署焉志閑素恬於仕進無表襮之飾雖當路
諸公率賀弔一與衆往異時不造也門無雜賓惟經
生朔望承問及搢紳道義交數人而已接士以禮雖
新進後出與之鈞終日談辨惟謹無戲言情色是以
受詔入主戎客於都亭館由慎恪以得之不呼僧及
道士嘗執親喪自括髮至祥練皆案禮變服未始爲

世之所爲齋薦者惟卒哭後遇祭日與數門生誦說孝經而已罕語浮屠氏亦不稱言排訾之熏蒿蘘梗可以動氣焰者皆不動近不問家產增狹晝治官事夜還讀書誓御亦簡其面故能多識博練自臺閣文書故新品式叢夥紛厯有所咨訪者咸能記之太學禁閣容巨三局閱二十年仍其任本公不愆不忘故也尤精易及楊雄方部學初公七歲母夫人令授易是夕夢公吞紺蓮夫人旦而撫公曰兒善讀此後必貴顯真宗果以識拔晚年愈刻志率三日一讀又欲爲子雲諸首作章句且患宋衷陸績范叔明宋惟幹

漫漶舛馳思盡黜之最後得唐王涯註以爲差近先作釋文一篇欲遂因王說而補正之亦終不果公嘗預注先帝集同修鹵簿記校後漢志孟子及律并義疏采獲是正多得其真同修玉牒分撰國朝會要未克就生平著述無編次家人搜摭得數百篇清緻平粹及在禁署益邇雅務爲溫純而采加焉居三城作詩百餘章推已指物曠而不怨有雅人餘風性寬厚多恕當官下未嘗以罪平鑄吏吏亦畏其明而安其仁樂道人之善好與人爲善每議事不肯自意出大者薦之二府小者與其屬聯請類多不可紀公一無

建白者其遠名若此然內剛有守不流於衆初善音者取上黨黍縱累爲尺因裁十二律以獻遂改大樂鍾石以合其私老師宿工者首鼠不敢議後有建言其非者上未有以決遣中人卽太常下舍問公新樂以縱黍定尺寧有非邪公卽撻班固律曆志唐令兩說付中人因對古者橫黍度寸今以縱亂橫其法非是中人馳入明日上坐邇英閣語公曰向考正大樂患其寢高而急今也下而緩二者不得其中失在律卿言是矣因出橫黍新尺示羣臣比縱尺差二寸一分而弱以校衡斗皆不讎當是時微公言幾無發其

謬者假有之果且不能取信於上傳曰仁人之言固博而利歟公前歿三日屬于一二僚執曰吾仕願素足今無一私以干縣官惟是窳窳累諸君已而得遺禮之文諄諄納忠訖無它語用是中外尤痛惜之公友隴西李公淑敕故吏相諷以終事嗚呼公有佐王之材不自顯雖持囊珥筆在省戶爲名命訓辭所出裁十二三使公當其時稍自崖異不難於進益發素蘊幸而十四五且次入衡筆不爲婆娑連蹇如今章章矣雖然命有屈於公公無不慊於道使素槩清埃奮厲無窮薄夫敦夸夫懼百世之後呻簡想風者以

輩魯臧文仲漢賈誼董仲舒此彼相易寧有失得間邪某曩以胄筵儀範刊綴音典皆爲公屬及此緒訓又參聞之故公治行之全頗獲詳究今日月有期矣官在三品法當得謚謹用第述上於有司節惠受名請遵故實謹狀

孫僕射行狀

孫奭字宗古年七十二歲公之先本樂安望姓後子孫有徙占博平者墳墓託焉遂爲博平人公幼好書術不事產利夙儒太原王徹以五經教授其徒數百人公往從之游及徹卒有從公質正謬惑者公厚謝

未答久之爲言其意義據深切人人厭服於是徹門下生悉從公以終業故其鄉之粹然仁者愛之其里之畫然暴者畏之會州將少文憎忌儒服公不見禮違之汶上樂其風土遂貫籍焉頃之吏上計文卽偕西遣端拱二年擢九經高第釋褐主莒縣之簿代還上言願以本經試最有司言學有師法於是以廷尉平直太學爲講員太宗幸上庠詔說尚書說命三篇動容稱善且嘆曰天以良弼賚商朕顧不得若人邪因賜公緋衣銀魚用是明年切免大丞相以郊禮及眞宗嗣位再除至殿中丞又侍講於諸侯王邸賜三

品服會丁內憂敦譬還職是正七經義疏以勞再遷
尚書屯田員外宧日帝命執政諭公曰朕悉而懿行
今欲改任宧官具以情上公卽對君行制臣行義量
能而授君也食焉罔避臣也又敢擇官以奸王誅對
奏天子納焉罷宮職以都官判太常禮院國子監司
農寺先是五郊從祀神無席尊無罍七廟時饗獻神
齊福互用一散尊豆無三甗登歌不以雍徹冬至攝
祀上帝外陔止十七祠饗先農乃在祈穀之前釋采
不備三獻公建言獨恭不裕專菲則薄卹祀媚神稱
而後宜有詔從焉自是器備樂完天壇啜食六百八

十九祀農更用辛後吉亥國學獻事不攝祠官重矣
與諸儒分集冊府元龜帝將東巡守攬瑞命建元封
命公乘駟至塞下諭契丹所以告成之意俄假節以
金絮卽王庭賜其君長廟飲策勲敘轉職方帝察公
守正持重小心謹密練達光明才任公卿明年除工
部郎中充龍圖閣待制判登聞鼓院以汾陰詔書改
兵部始封瘞二禮希闊于代刺取屬圖公皆參焉尋
介岱帝奉冊使還與文元晁公等同主貢條又知通
進銀臺司門下封駁事兼三班院時眞宗已封禪則
西至蔡上間接萬靈於殊庭大抵名上神靈之封皆

望幸矣六年遂下詔用開元故事款瀨鄉奉大清之祠公上疏引唐明皇以爲言天子雖嘉其意然謂稽古擇善何常之執更爲解疑論以示羣臣始尙書公年耆德茂重去鄉梓公至是上言不勝父子之情願歸田里盡溫清之報詔不許又奏願守一郡以便瞻省制可之乃守高密居部二年拜左諫議大夫罷待制之職還臺糾察在京刑獄祥符之降也始名天慶先天降聖爲盛節詔天下飭齋合燕費且不費公建宜罷以省浮用書奏不報未幾出知河陽天禧末縣官度用財仍稍稍減郡國祠醮終如公言郊祀恩改

給事中公連年自表以尙書公年九十案禮家不從政据令許解官侍養帝覽奏歎息詔丞相府曰孫某或請急過家及欲近郡則德之乃就徙兗州明年改元乾興眞宗之後元也其三月今上卽位例遷工部侍郎八月驛召公還拜翰林侍講學士俄知審官院仍判國子監復知通進封駁事兼羣牧使會修先朝實錄以公有胥臣多聞羊舌肸春秋之習命參其典領尙書公寢病也朝廷知公孝特許乘傳視疾再宿至汶上實錄成就遷刑部及尙書公齊終公號慕癯毀尋詔奪服公固願終喪上命貴臣散喻公不得已

還都復舊官頃之兼判太常寺及禮院再知審官院以久次授兵部權吏部流內銓又兼龍圖閣學士貨茶轉貨法久而做計臣欲捷囊橐權浮淫實繫參定以興長利初公之勸講也往辟亂亡臨文始爲諱有可以規益順諷者必諄諄爲上言之掇五經之切治道者爲經典徽言五十卷奏御繪無逸篇爲圖願置便坐爲位二觀省之助時母闈輔政五日一御事公固言古之帝王朝朝暮夕未有曠日不朝者也陛下春秋鼎盛宜日御前殿見羣臣發揚健粹覽照治本而上方奉養長樂故謙讓未遑也於是公年七十因

請問所致所事上章者三皇帝與莊獻太后特御承明殿存諭數四公頓首且言勸道無狀以暮日希遠塗恐不能自還無以塞責乞全首領爲陛下之賜因泣數行下上亦惻然猶詔公與今龍圖閣學士馮公元講老子三章又命今禮部尙書晏公殊讀唐史是日各賜帛二百疋後數日制詔報公果不得謝更求近郡上乃從焉改工部尙書以本職復爲兗州且命須小會畢乃得辭待禮復數月請行數矣乃宴于太清樓樂闋上出御飛白書宰府樞臣大字軸各一學士以下小字軸各二惟公與文元大小兼賜焉朝廷

榮之竝詔賦詩述所以優待師臣之意明日詣承明謝且陳將奉違帷幄上亟命取老子講如前章既罷仍有具衣釘帶材馬之錫及治行也又宴瑞聖園就賜御製詩一章復詔近臣爲詩以餞議者謂漢疏受桓榮烜赫寵光不克過之明年耕籍改禮部公爲政多惠利嘗奏復濟瀆故道渫其鍾水濟鄆之田微公其魚所至興儒學教導不純用法律有足稱者事皆責丞史掾屬總綱目而已人皆宜之不見爲治之迹明年以病自乞上知不可奪乃聽遷太子少傅歸老夏五月疾篤戊子移居正寢命子孫曰明日禺中吾

當逝矣且吾在仕塗四十年訖無悔尤乃今奉遺體終牖下君子其以我爲知命口占遺奏初不以家事爲言又謂子瑜曰逮吾屬纊當無內姬妾獨若與諸孫在庶不死于婦人之手己丑如期而薨訃聞天子廢朝震悼以左僕射策書驛告其第延其賞於子及孫二人焉賄稱贈之士之仁且賢者莫不相弔徽數令名泊終益榮夫人天水趙氏以平原郡追啟湯沐三子曰瑤仕歷司虞止員外曰琪止衛尉丞曰瑜今爲殿中丞息女三長適高平范昭季適昭弟曙仲適琅邪王景仲蚤卒公於學無不該總精力強記絕人

遠甚以其爲禮莫大於祭故受詔次宋興以來郊廟容典爲崇祀錄祭莫尊於天故本其六名實則一帝是康成排王肅彷彿千載貫諸儒之論爲南郊奏樂莫盛於雅故哀羽萬同律爲樂記圖孝莫重乎喪故援古塞違爲五服制度五經之學章句數十萬後生佔畢厭苦其說故作五經節解刪去盈辭又請以劉昭後漢志禘范曄之闕尙書釋古文以檢考今文謂孟子附聖立書莊周根道德之論律有學科宜並刊布又同定論語爾雅義疏皆鏤槧垂久唐明皇刪定月令自竄新意其事淺而不篤公乞復康成舊註還

其篇次議雖中格禮家躋之在內閣也真宗賜歌詩俾之次韻公屢辭不聽乃有賡載集資質詳審進止如有寸尺無僂言遠色接誘士類侃侃如也或以奇袞休之則玉色山立不得而撓然志尙隱約器服塵素不徼福於神不愧辭於人善推己以恕物不格物以己長讓夷損怨稱爲長者尙書公之疾革也公舐潔其面以代頰御未始就子舍褫衣帶養者以爲難安車之還也日延鄉老道舊爲樂先時邑子或從公家宰貸息錢濟劑券紛紜酒酣公命折而焚之凡散數百萬其推轂士不進不止成就諸儒甚衆而馮公

元諫議大夫孔公道輔先顯公爲內閣馮甫從初命
入太學不十年抗茵憑侍金華與公同列云至於日
月獻納便宜施行者存于有司伏青規秘阜囊則詭
辭焚藁外無知者嗚呼公有黃中通理之才服勞累
聖發舒事業旣光大矣第不登三事謨九德寧天齋
公緼而不使盡邪將人匱公賜而弗及庇邪知與不
知咸爲公恨卜窆有日節惠在茲敢摭雅行告于有
司謹狀

石少師行狀

公諱中立字表臣年十三居僕射喪毀而慕僕射有
功於太宗朝數欲倚爲相會薨甚悼痛詔公自褐衣
爲西頭供奉官方功臣子飾輿馬衣服相夸詡公獨
折節從儒者游稱道六經百家之言年十八獻文于
朝換光祿寺丞賜銀緋三遷殿中丞推家貲與諸父
一不靳愛後姻屬相閼恨更引公爲證公辭不答遂
以孝讓聞眞宗咸平三年以本官直集賢院與號畧
楊億中山劉筠穎川陳越成紀李宗諤相厚善億工
文章采纈閎肆彙古今氣象魁然如正元元和以此
倡天下而爲之師公與劉陳數公推轂趣和之旣乃
大變景德祥符間號令彬彬謂之爾雅而五代之氣

盡矣朝廷有所論譏公與諸公未嘗不在善讎書不
妄下朱墨凡秘書更公手者皆爲善本改祠部員外
郎判三司理欠憑由案進刑部賜金紫以兵部爲鹽
鐵判官以禮部郎中判南曹移戶部句院上卽位遷
戶部充史館修撰糾察在京刑獄初公與併肩踵武
者後徃往至達官或且物故公獨歸然與新進治作
文書無纖介舛望士論高之天聖四年始以吏部郎
中知制誥俄知禮部貢舉歷判集賢知審官院爲契
丹國信使坐舉官不如狀罷修撰糾察司數月復糾
察轉右諫議大夫給事中知通進銀臺司門下封駁

事景祐元年爲翰林學士判秘閣轉禮部侍郎加承
旨兼龍圖閣學士半年擢拜參知政事公於臺閣舊
章多所練達性慎密爲上言天下事旣出未嘗顯犴
臧否不多取名故稱爲長者明年以戶部侍郎罷爲
資政殿學士判尙書省久之轉大學士遷吏部兼提
舉祥源觀慶曆四年致所事於天子除太子少傅聽
謝皇祐元年轉少師其八月某日薨享年七十八贈
太子太傅公精識遠照盡性命之理故未嘗問通塞
久遠所至樂善下賢雖非行輩猶與之鈞當功名之
地人取我否不爲人所媚疾夫怨悔不貽諸人雖哲

景文淵公集 卷之六
人猶病之歷二十官五學士皆久次平除晚節乃參
機務其恬於進不靳黨助如此初家產歲入百萬錢
公既好賓客諸有名士與之游盡取爲酒食費略盡
稍稍腴減亦不增殖末年所入歲裁二十萬捐館之
日家人不能爲喪具當公之病天子憫其貧賜銀三
百兩蓋古人所謂清者如公等非邪公之子國子博
士從簡以哀死苦次亦世服名教者今葬日薄禮有
易名用哀遺懿上之有司謹狀

姜副樞行狀

姜遵字從式年六十八公之先本齊姓漢以豪傑徙
天水後葉復貫淄右今爲郡人焉公幼岐嶷長而沈
毅初肄儒業治百家之言深博自將文藻足用既與
鄉俊有聲於齊魯間屢挾策干宗司以經濟自任咸
平三年眞宗始御軒陛延髦秀公以進士擢第於殿
庭明年補登州蓬萊尉治有風力郡將供備庫使水
邱隆貪其幹用奏請就補本州理曹掾且參軍事朝
廷報可未幾丁內艱去官免憂闕都銓舉充開封府
右軍巡院判官京轂浩穰獄市居天下劇爲吏者罕
能以課自脫公至則勵辭氣探情僞厥職修舉庭無
留事二囚自誣棄市罪獄將具矣公微得寃狀翻其

文致先是雪寃有賞公慮傷前主者寢不自列祥符
初秩滿判大理寺丞建封恩例改殿中丞出知吉州
廬陵縣氓籍數萬氣俗荒獷左言闕貌以久訟爲健
公威克明斷摧破姦黨據案一決吏民厭伏汾陽禮
畢就改太常博士得代歸闕時前丞相天官正公在
西掖熟公治行卽薦公才幹抨察視之任有詔換監
察御史八年以勞遷殿中侍御史充開封府判官賜
五品服吉州守高惠連誣構公廬陵舊事奏請逮訊
公聞命不疚馳往對辨左驗明白訖無污蠱還臺以
□□同判延安郡天禧三年召還遷侍御史判三司

戶部句院俄出爲陝梓利夔等路體量安撫先時公
舉奏山東大姓姦利事至是皆伏法天子以公建白
有狀未復命卽拜尙書工部郎中非常例也使還出
知邢州今上卽位就轉刑部移守於滑俄充東南轉
運使天聖元年換京西路不旬日召以本官兼侍御
史知雜事加賜金紫受詔詳錄計省逋負之籍科別
蠲貸明年遂以本官充三司戶部副使三年改兵部
郎中遂歷副度支鹽鐵二使務俄攝太僕卿充北朝
正旦國信使四年還節領職如故其冬拜右諫議大
夫知永興軍六年春駙名以本官充樞密副使七年

遷給事中八年秋感疾請告兩宮馳親使挾太醫相望於道存神省慮形於慰勉九月乙丑車駕親視卧内賜白金三千兩丙寅薨於某坊第之正寢上聞震悼復趣駕臨弔制贈尙書吏部侍郎法賻所須率在優等夫人路氏國子博士從古之女封平陽郡夫人公三子長曰居正舉進士早夭次日延齡任太常寺太祝三日餘慶未仕四女長適棣州商河縣主簿王翔次適東頭供奉官閤門祗候宿若虛次夭於室季尙幼孫三人曰承顏試將作監主簿曰正顏齊顏及遺奏之上延齡改大理評事餘慶特授太常寺奉禮

郎正顏齊顏竝授祕書省校書郎外孫宿拱之授三班奉職哀榮之數存歿之恩篤矣公長昆昭範治春秋經未中第次昆著以公貴載授太子中舍致仕今皆物故公天資方重内孝而外嚴家庭之間有若官府性長於吏事濟之以忠力未嘗阿附當世故所莅必震肅所言多指切前後進用皆上所自知又以感昔人削藁納誨之箴問樹漏言之誠故闈臺奏議樞機密言天下事甚衆世莫得而知云惜乎參基命之司歲律未幾遠猷熙緯弗克究公之素寒暑興沴棟梁其萎然可謂雄峻之寶臣黃中之元吉者已節惠

易名國有彝典謹次官闕告于有司謹狀

景文宋公集卷第一百單七

景文宋公集卷第一百十八

原本卷首
三頁佚

啟狀

代王相公

漢風隆洽宗臣遂萬物之宜晉道宣臻綿寓無窮人之
諺蓋所以恢明職業暉潤典彝俾百度以惟貞靡
一夫之不獲然後翊巖廊之景化贊法座之鴻樞寅
亮懿綱緝熙駸馥撫辰疑績冠茂伐於人彝宅揆奮
庸飛淑聲於帝載永言休範宜屬洪鈞恭惟某官日
域靈輝天球瑞質粹儀霞舉會筮宰之昌期偉量淵
渟稟天人之先覺夙蹈凝巖之地亟推渥縟之私建

竑議以朝熙舒懿文而麗國論思東序先賈誼以受
釐開宴西清化倪寬之上壽自邇彌綸庶務叶贊宗
工潤綠詔之溫純參黃扉之宥密出驅元乘慕談笑
而卻軍入奏青規用春秋而繩下茂勲舉集景眇荐
隆旋以國家上聖凝圖虛皇委覽紫清之誨延密論
於真官綠錯之文委鴻禧於命曆寢尋墜典茂建宏
猷追上世之登閣講鴻儀於希闕天壇祕牒檢玉以
升中汾曲隆睢瘞繒而報厚申明絕業祇答上靈矧
復整仙輶以時巡款蜀壇而順拜鬱華之館緬想於
道真藝祖之區誕頒於侯度宣恩羨溢紀瑞殊尤乃

至真馭下臨聖衷登格珠官寶地巖蠖濩之珍祠琅
簡雲章薦厖鴻之不構並繫碩畫交展縟儀至於約
烏策之舊章紬鴻都之秘記搜遺冢壁大備於討論
增絢緹紉動臻於良直裁成大典昭示方來以至按
瑞謀之著明測祥源之易奕上窮真系憬集珍文賁
紫宙之奧符紀翠媯之元命再刊青簡分秘殊庭斯
竑發自訐謨騰爲穆頌鏤于琬琰充人金匏果膺揆
路之求荐正星階之位咸事九德掩臯陶之矢謨不
出十年邁樂安之故事民瞻式係天眷日躋凡該動
植之流盡被陶鎔之化竊念某蠢冥有素優仕無聞

濫巾綿絕之司遙乏華纓之列飲冰受命夙畏於簡
書越俎代庖敢踰於官守徒以幼屬垂鴻之運長推
延世之恩進懼食浮中疲智効延年斟酌寧有合於
當時潘岳拙艱本無裨於巧宦泊膺明命出掌關征
策駑筋十駕之勞勵鉉鉅一割之用求大夫之仁義
方冀筋躬論文學之銅鹽未能卒業旋屬庭闈失養
怙恃纏悲對風樹以長號撫垓蘭而永想九回結歎
慨無嗣於弓裘十死茹辛幸未先於犬馬逮喪除之
云畢復譏賦而是司權貨殖之耗登謹簿書之出納
雖復激昂單惠訂正舊章犯慮裝懷盡分於節目展

體率職無潤於脂膏期王事之有終誓詩人之盡瘁
然念物情素定固耿介以難移吏道寔繁豈姿材之
可學甫終考績粗免曠官効方朔以上書徒取恢諧
之誚慕子真而乘傳更懷孤遠之慙重念先君侍郎
早接遊從豫聞風義趨平津之閣款睇有加託趙氏
之孤緒言多在遽遺淪裔上惻鴻私俾餘構之未墮
實休光而是賴而又質方違願祿縻代耕素衣已化
於京塵雪履將穿於車府先疇遷貿會無平子之田
藁質支離屢緩休文之帶苟媒銜自逃於醜行則再
三奚決於蒙亨伏望某官鄒律融春傳川借潤辨頑

金之自躍許蟠木之先容特拯迷途俯矜舊物憫周
南之顧託軫江左之流離雖鱗鱗並逃寧虛於漢戩
而牛羊無擇何間於齊仁激波儻化於海淮伏卯庶
求於時夜願著靡捐之効少酬全度之恩過此以還
未知攸措

上江提刑

媯廷佐治臯陶爰作宥刑周室移風姬旦乃求中典
皆欲裁成經制丕奉珍圖闡熙洽之洪猷賁清寧之
景運是以五刑之宅期至於無刑三刺之文僉同於
羣吏聿垂懿範昭著方來而中代已還淳風不競作

僕區之法始自於諸侯鑄刑鼎之書寢興於叔世重
輕交失抗敵乃多無鈞金束矢之平有絕澗游禽之
刺至乃秦脂疑密窮十失於隆刑漢網恢疎約三章
於愿法飈流既異沿革靡常逮夫王道下衰憲綱增
縟前律後疏漸紊於常經倦令敝民罕躋於鴻化道
無終否聖乃嗣興國家撫五代之遺黎開九皇之眞
系交張治具燮定元基刑屬三千緬追於遐武號居
十二永念於懿綱適底劇之繁文重齋居之移讞湯
網屢祝犯命而乃誅堯屋戴封畫冠而知禁然猶念
綿區之至廣愍昭憲之未孚臨遣信臣按行列郡片

言而折許龔遂之便宜露板以聞用田仁之刺舉導
迎寬政宣布湛恩苟非冠績吏師騰英朝美攬轡負
澄清之志奏刀揚耒騶之聲則何以佐山甫之將明
副重華之欽卹定國之持獄自以不寃宣尼之聽民
可使無訟永言宸睠是屬正人恭惟某官日域凝華
仙莖宅粹六世冠冕盛南國之道風十紀羽儀有西
京之世德英聲煥發懿實流聞早推射策之功亟奉
率絲之寵優游上列蹈勵凝猷御珍駕以駿奔翔倉
垠而上擊分麾使竹允著於循良掌籍道山載加於
紬繹旋屬近臣慰薦清問疇咨定漢絕於一王慙周
行於三署問鬼神於前席方慶受釐儼車服於私庭
更旌稽古寵章彌渥嘉績荐凝瞻言全楚之區夙重
輜軒之寄賦輿錯出法敝於誅求貨殖懋遷俗淪於
喾窳果頰刃地出按簡書揚惻怛之深仁決攘爭之
健訟奉違仙闈卽舉詔條一成允極於盡心五月旋
聞於報政以至星罕弛籥霜隼霽威文無推案之功
飾絕投書之訴民懷格耻罷惡少之探丸吏黜舞文
鞠圓扉之茂草坐清周犴欽輔禹孜弼成議緩之功
實賴神明之化頃者邊氓人保遐障驚師密連篁竹
之酋潛議萑蒲之聚怙茲綿力屢擾齊民乃至虎節

會軍牙璋置守出奇謀於堂上視醜虜於目中尙笑
餘妖敢稽天討而復親承深詔躬督銳師按炎檄之
舊封塞壺頭之險道弋舡狎至雀軸相望羊祜輕裘
不廢總戎之事馮唐尺籍雅更持節之勞搴旗未暇
於窮追具沐已聞於相弔收鼓銅於駱越浮寶無遺
駕灰乘於零陵前茅載肅克震梟牙之銳式封鯨觀
之誅七旬咸格於苗民五刃竝囊於師節集成茂伐
皆屬全謀果膺進律之恩特舉疇庸之典銘功隆謁
方震於天聲列象哀烏再光於郎位便合速揚上笏
丕迪清衷豫密勿之鴻樞注凝巖之景眇出參法從

陪翠帽之宸遊入直周廬佩紫荷之仙棗然後賡奚
作頌佐稷陳謨克揚英茂之文欽奉都兪之對永言
茂躅方啟亨衢敢因慕義之辰罄敘由衷之懇切念
某材非楚有士愧燕奇偶游泳於太和遂寢尋於秀
業青衿學校幼參方領之游黃卷聖賢長豫冠章之
列猥屬書同之運不忘時術之功外愧育材中疲燥
吻轅生抗辯遏逃城旦之書巖幹談經終謝太官之
傳勵精雖切底滯居多加以扣寂冥襟希光俊域漱
九流之芳潤搴三代之蕤英得於縹緗之餘致在緹
油之末問劉棻之奇字靡憚咨詢持丁廩之小文方

求潤飾十日敢矜於恃氣三年偶遂於變儒不意天
難匪諶靈根夙殞陽橋陰梓永悼於清暉遠壑隆墀
再充於浩歎憤百身而莫贖濱九死以奚追驟歷炎
涼偶存食息撫心自惋非游吉之亢宗投袂失圖僅
馮生之齋志矧今翹英命秀跡弛輿廉濫多士於金
華濬洪源於璧水場駒交繫邱帛旅馳雖天網大該
盡收於絕足而羲車停午莫照於幽盆蓋舛運之所
纏致青雲而坐隔播精寡効空謝於支離列地無成
自傷於泝澣載念道將時背才與願違采榮而瑜未
掩瑕務進而尋將枉尺執中黃之賤虎志極固窮貫

梁甫之枯魚感深遐慨顧惟蹇薄深懼淪胥此者幸
遇某官恢誕素功鎮寧雅俗敷文華而飾吏用敦厚
以變風比闕里之訓人不忘吾黨類何侯之按部先
見諸生某是敢望履祈通游藩俟進示壺邱之天壤
雖有悻心宗郭泰之龜龍寧忘素志儻或俯矜叢品
許覲令儀念完士之一言采詩人之下體陽秋借譽
俾陳蔡之及門月旦口評許老韓而同傳稍遂蒙亨
之志誓銘征吉之恩過此以還未知攸措

代回呂相公

顯膺朝冊入冠台司定命前頒至公胥慶恭以某官

稟天正氣蹈道至和親逢聖真翊贊皇極九德咸事
六府交修亟辭衡鉉之崇迭倚翰垣之重辰階有於
公袞實歸建三人以調元固萬樞而思父讓誠雖確
褒制終行卽鴟閣之便辰煥槐庭之盛禮良哉嗣唱
具爾均瞻尙敦禮於朝風且移書於宰屬永言下綴
方庇洪鈞慶論道之云初佩敷言之彌縟欣悰感緒
并猥于茲

回宮師呂相公

荐拜囊封懇歸藩政安車得請懋冊延褒志遁成功
誼光逸老伏惟某官行爲民表器適時中慙事三朝

勤勞一德公槐弼輔聯周宰之懿猷仙菊侑餐訂漢
台之難老嚮總鉉旄之重聊藉翰垣之行日於公歸
共熙天載而素懷知止確奏引年激世教之競浮重
宸襟之嘉挹特申冲請用獎宗工冠品官朝燕居京
輔揮金娛日匪直二疏之榮束帶會朝仍亞三公之
著永言茂躅足煥常均某夙庇埏鎔欽懷耆艾第結
冥鴻之慕莫奉赤松之游猥辱謙懷先貽榮問仰緒
風而增悅銜至誨以忘劬瞻愧歡翹萬一無喻

回大名李相公

光訓制恩榮分師節伏惟慶慰恭以某官地居賢亮

景文公集 九
業挺謨明歷相三朝迭蕃四國直躬蹈道種德在民
具爾之瞻實同一哉之心允協比緣巨屏遴擇守臣
果屬吹塵之賢遂寵齋壇之拜使牙肅引幕府宏開
包魏壤之河山粵名都會掩天街之畢昴繫賴撫和
諒此殿邦何稽入輔某幸聆成命參奉贊書方抃私
悰遽窺鈞翰荷巖廊之舊庇銜義府之餘滋感愧所
并文陳罔逮

回夏樞密

光奉制恩復聯機政僉俞惟允欣慰斯符伏惟某官
基德溫恭經謀隱濟聖期參邁宥命實司嚮憤諸戎
之騷自請中軍之總由陝而右盡護將屯持旄以西
躬授方略屬邊防之如律且宸眷以於咨亟走名車
俾歸使節又天樞之祕劇用遂前勞賁朝冊之光榮
蓋均舊物尙聆謙執未卽欽承方露奏以讓還并移
書而敷述矧惟定命夙告治朝幸廢冲懷早祇蕃渥
感悚并素交戢于茲

回狄侍郎謝轉官

茂膺方贊外亞冬卿賞典有光朝言胥允恭惟某官
叅和熙采安節蹈中世咨樹政之良上倚告猷之穆
輟于法從撫是价藩徧愷悌於懷人浹中和於儷曲

職勞騰報增秩許留尚蒙潤於靈波足露華於賜冕
遽煩騰訊數列感懷矧惟公爵之行敢荷歡言之辱
姑欽謙假冀永銘藏

回李太尉

顯奉宸恩就兼戎壘居幕府折衝之任用假鷹揚領
羽林宿衛之兵遙資肺腑親賢參倚忠毅兼推渥命
霈行榮函首暨閱謙言之數悉慶使範之光華其在
欽銘併于誠悃

回王龍圖謝改職

奉承褒檢改陟華聯由漕最之比聞實師興而有賴
采通禁籍就總雄藩參我武之訓嚴慰彼都之翹冶
方昭賢業遽枉書辭矧當熙采之辰何損敷言之懿
載惟感緒姑誌深悰

夏太尉

總臨陝服入守雍都師錫所符寵靈茲煥恭以經畧
太尉大猷遠業文事武經忠結本朝功暴羣辟向者
羌酋畔逸軍瑣謹嚴首圖舊人出制師節會風塵之
微擾苦部領之素分邊奏薦聞睿衷改制亟換高牙
之鎮盡護西方之屯幕府大開屬僚參建決千里之
勝聊假坐籌便一切之宜靡從中覆望高羣帥威懾

殊隣諒繫方叔之行企賀營平之捷某早膺台眷欽
覲恩章歡素所并費詞無喻

回夏樞密

肅奉恩函還參謀幄露讓封而確請稽寵冊以彌旬
中詔褒敦薦紳聳竝果緣宸眷遂屈素懷茂涓剛日
之良對越王休之盛寶釘有爛聿將麗服之華閑馬
斯材併侑康侯之錫折衝是賴基宥云初敢冀謙冲
曲詒誨翰署行方箭已抃於懋功申誦書辭益欽於
悅禮載言欣感姑永銘藏

回三舍人

被寵制函聯榮禁掖伏惟慶慰恭以某官機神秀舉
器采詳華自州士以蒸髦逮朝綏而遙羽含章襲美
遂暢於四支大對危言實均於千牘允升清貫茂對
聖期向以星省須才槐庭給簡旅咨宅俊人代出言
曾桑蔭之未移粲綸辭而已屬奏篇上御成命遂行
蹈四戶之凝嚴分六曹之平決尙方染縑聿頒安吉
之衣武郡封泥式布溫純之檢方欽詔德猥辱移書
獲窺採藻之工兼幸判花之接茲爲欣仰併戢襟悰

回安州范侍郎謝上

肅奉璽章言馳旌馭合符惟謹坐閣云初流美化以

在人雍太和而視履華樞舊望聊均左使之勞細札
寬恩更厚南公之幸敢圖謙裕遠錫誨言咀辭味之
豐腴泳情瀾之霑渥此爲佩戴永誌誠悰素籥蕭辰
黃堂暇景益遵頤實胥副民瞻

回杜樞密

光膺制命升贊樞庭伏惟慶慰恭以某官識畧宏深
忠謀鯁亮休有老成之德荐階華近之聯朝夕告猷
濟天人之名學紳綏倚重蔚柱石之良材果被僉俞
入居宥密方露固辭之請且敦難進之風矧邊瑣少
勤帷籌虛竝得賢爲賴崇讓匪宜諒外迫於至公必

難諧於素尙敢期謙挹亦示誨言欽俟拜嘉始符翹
祝

回夏宣徽

光膺茂制改建高牙伏惟慶慰恭以某官亮節純深
嘉謀隱濟比煩西略荐筦中樞參盟作礪之山增重
敲雲之鼎方乃上還劇柄懇避成功綠石席之重違
遂翰垣之光撫寵深易地任切殿邦尙聞需奏之勤
未卽齋壇之拜并流餘誨具述冲懷顧成命之旣行
匪善辭之能已竝交恩節用慰翹衿感戢于茲名言
岡喻

回杜樞密

肅奉制函進聯機省協于上德佐乃訐謨方安節以
辭隆久稽恩而並報亟紆敦詔罔遂謙懷式涓休令
之辰茂對延登之典便蕃三接密勿萬樞惟賢路之
有光固公言而交慶尚流榮翰敷致感辭仰欽圖舊
之良參服降階之懿永言悚抃第戢襟靈

回鄭樞密

顯膺中詔參幹內樞伏惟慶慰恭以某官業總天常
道躋民極育卿材而有蔚序皇器以斯華政緝九畿
利鉤六筦休有不績簡于上心果陞諫掖之嚴入佐

天機之重紳綏動色慶嘉遇之大來帷幄並咨本朝
言之師錫側聆謙執未卽寵光伏省戶以固辭眷幸
僚而示誨竊商眷倚必有敦褒望回初節之甘速對
茂恩之縟欣銘企聳併萃于茲

景文公集卷之三 華開初集卷之三 中對之辭

光膺詔綍參總政機伏惟慶慰恭以某官學際三儀
謀經九德若時佐聖駿格奮庸自命節以歸趨翊帝
樞之宥密終緣民望還貳台司超進七兵之曹增重
玉槐之路俞咨素定朝野相觀承尙讓以自陳頗留
恩而引避并垂緒誨式履終謙况敦詔以尋頒幸雅

懷之無固傾斬對寵併釋翹誠

上皇子賀封建

光奉冊書肇疏藩社伏惟慶慰恭以壽國公太尉衛
齊異稟岐嶷早成席海潤之洪禧擁日躋之休問先
親有典僉議取揚屬公府以上圖詔治朝而備物壹
茅分土居承列聖之華開府秉髦聊示中權之寵維
城斯叶洊震云初某幸服邇僚歡聆渥典欽於介圭
之謁益昭綿賕之遐抃慶所叢文陳罔喻

回資政李侍郎

重違藹朝言而胥仰睿矜申眷恩數具藩進通殿籍
之華升貳天卿之峻功名弗處自安利往之常筌宰
相期彌見親逢之盛流風所泊偷俗爲敦敢冀謙懷
俯詒公翰味辭條之敷衍激心術以銘藏矜式所深
文陳非敘

回晏樞密

奉被制兪冠司機省露騰需奏確布謙懷留渙冊以
淹辰企羣情而戢抃果聆溫詔終屈撫情三接便蕃
趣俟斯猷之告萬樞凝遠式繫同底之和欽覲寵華
方深慶豫荐辱書辭之祝仰御德柄之勤歡感茲并

敷陳罔既

回韓侍郎

東鈞舊德維枳輔邦嚮緣共治之宜遂倚于宣之重
下車未幾班詔式勤浹嘉頌之歡流藹太和而煬攝
猥詒芳翰敷衍謙懷欽言雋之永長服潤波之霑洽
載惟感緒姑戢煩悰披晤方賒瞻斬參極

回程左丞

茂將明命近撫奧藩涓日惟良班條云始土風甚樂
聊資造適之宜河潤有餘方並帡幪之賴敢圖謙損
亟注誨音絢邦範之有儀敷感衿之多緒永言申誦

敢怠中藏獻歲方春趨風未日慎持齋疾用副眷懷

回夏太尉謝男授提刑

治應最條寵加使節士論欽歎臺札布聞惟雋路之
翰飛本親庭之愛教克家用裕襲謹不衰方欽駢牡
之華兼覲良箕之盛猥紆緒翰周述謙懷窺覲喻之
有條第昭銘而無斲自餘景嚮曷罄名言

渭州王密學

被褒制檢帖職機廷聿獎成勞寢華近綴易藩宣之
劇部藉方略於中權愴我天威被于戎落方欣信賞
猥示芳銜欽倚辨之在辰枉敷辭而敘感第銜謙意

永誌深悰

夏宣徽

榮奉制恩進聯徽省恭惟慶慰伏以某官大猷體遠
盛業謨明以文武是憲之資更安危所注之重叛羌
阻命謀師倚成籌制前茅式遏西畧屬邦嚴薄伐帝
錄久勞申擇禁廷之嚴徃增使府之重戎軒務劇聊
籌南仲之勤胡落數殫企露營平之捷王縉誕布朝
韞胥歡某早庇末光欽聆茂渥忝署付行之請阻伸
慶謁之儀距躍于茲名言曷罄

李太傅惠先令公碑文

圖昭先烈仰達奏封詔大手以舒文咨健毫而潤石
義均峴首名煥京阡裝擲至精布傳彌廣借沁波而
不腐慶貂葉以滋華謂接曩游亦詒副本申復披文
之妙周知濟美之勤感哉所叢名言罔喻

回轉運龐待制謝轉官

職勞有狀滿歲當遷真拜郎闈卽褒使府允穆紳綏
之論踵增簪橐之華况自陝奧區雄邊列戍令糧大
廣擊轂尙勤諒茲進等之階聊啟懋功之漸劇煩敦
喻益見多儀銜挹所深銘藏曷已

景文先生集
言於玉署思式方夏實尹王京懋涵化源裁定民極
久儲上帝之賚果躋三事之榮百工傳聞一□□嘆
神介于福固正直之是歸君庸作歌信明良之胥契
於光熙緯遂正上公某方剖州符阻從賓序乃情叢
抃臨翰難文

回王太傅謝高陽關部署

光奉制恩出護屯壘僉擇惟允欣頌兼常某官挺器
過人移忠許國肅提千騎之警叅守四方之勤眷惟
河間最重戎闈副貳之劇武力是賚果契公言訓定
師則何冲懷之狗好眷宓師以移文切仰干城已孚

於先甲自然鄰國可假於餘光感著歡愉併萃情府
回李舍人謝知制誥

寵牽制綽進直禁垣除目駛騰公言胥抃恭以某官
思經民極迹踐聖藩對於亨期光我王國含章襲美
遂暢四支應用觀能不名一器故步書林以文顯持
使節以幹聞上簡帝心陰儲士望適以右闈虛坐雅
誥須才被召三槐之廷試草五芝之檢程文甫御定
命俄頒褒然丞髦式是辭省漆墀叩謝聿新染葺之
章宰案聯暉尤重判花之體况代言之任歷選甚艱
必潤色討論鄭無諸侯之難以深厚爾雅漢同三代

景文先生集 卷九
之風惟今值賢訂古無愧必且言參粉澤賁百度而
光華筆隱風雷浹四方而鼓動敢圖謙槩謂接明矜
推嘉會之所從墜餘音而申眷豪英在選方欽名世
之華翰墨相先更篤與游之幸載循欣懌罔喻端倪

代胥舍人謝啟

經星祕掖素號於凝巖瑞鷗神池驟階於機口彼褒
函之載郁紆賜紱以增華宿昔自循震慙無措恭以
國家財成訓告稽合本元監渾灝於三王討溫純於
二漢由綸之出愆慎於始基如天之章昭回而臨下
疇咨邦彥進宿官成是必積美弼中高文近雅挺安

于秉筆之操本周興韞櫝之流爲國丹青有古風烈
迺符僉論姑免冒居若某者生本地寒長而祐薄偶
易農而顯仕因挾策以觀書能賦能銘未習大夫之
事小言小道才齒稗官之流濫賞相於里人預偕來
於計物過塵策射旋贊部章歸課上臺玷名仙室佐
閱吏曹之實間圖繇野之儀日畿之繁墨綬茲忝寶
興失實劾免去邦旋蒙三赦之仁追引九門之籍薦
膺佐治遂俾出麾弃杖復林寒灰始焰逮終更而來
上邈歸報以無期忽被恩符參陪計局籠財權利但
苦於沉迷二令辟名未施於鈎校我且記言右史糾

景文公集 卷九
三
讞中都拭玉□□之庭慎修交□握蘭建禮之署再
用序遷官謗愈譁績幽自審方期襍被庸警敗材不
謂天誘其衷人乘所乏召詣坐槐之府趣程視草之
工慕受詔而輒成第欽拙速顧每篇而稱善絕企前
修俟訖程觀當從報罷遽荷睿明之養擢升清切之
司使驛下臨笥章垂錫恭惟名器至重竹素具存贊
內史之出方遂爲定命潤裨謀之謀野必扣大猷分
押尙書之章至均政事之食協華在運稽古任良重
念拘攣韁瑣之餘轉側風波之後壯謀奪於多病懜
學廢於長年旅翻易驚孤根難殖責高才而或躋先

下品以奚堪此蓋伏□某官表燭人弊彌綸□律亮
師師之百度已惠庶工開穆穆之四門彌收俊德曲
暢陵阿之化務安薪楨之宜遂俾妄庸亦膺束拔敢
不稽參流晷師式大常絢裘英之五紵奮刀鋌之一
割熟芝裁檢謹敷天下之言絳藥翻階居慎省中之
對庶申尺寸仰副陶埏

代鄭公謝叅政狀

祇荷褒綸擢陪台席丞露陳於讓奏枉垂報於敦言
趣拜寵靈交深榮腆切念某本緣儒服驟旅朝綏寢
持從橐之華采蹈禁門之複茂齋最狀少報上仁方

虞且傲之訶復忝敷求之錫諫曹茂秩政弼崇聯雖
薄訴以冒聞猥批章而蒙諭寵非其次將忍終身之
慙服不值庸更畏十人之指此蓋某官封殖夙加題
評素定因叩叩之訪逮亮斷斷之顛愚助育讜才贊
行賞典敢不益操深志仰叩大猷載驅駑緩之姿或
禦負乘之寇冀紓誚議少答恩勤感灼叅懷名言罔
敘

回宗室使相賀叅政狀

肅膺褒制升贊宰司祇荷寵靈交深感腆切念某謏
材曲學憇慮煩襟興于悴族之餘玷乃殊科之選薦
塵榮次取愧英游幸遭山藪之藏弗責斗箕之實獲
紆罪戾寢易歲華不謂台序乏員宸私誤獎諫曹上
列政弼崇聯尋味死以自陳冀回恩而改擇曲煩聖
喻終廢危悰已冒服於官成方震慙於心術敢圖宗
哲先枉書辭絢禮意之謀勤助邦猷之僉錫庶緣外
獎少追多言佩戢于茲文陳罔旣

代回宗正狀

叨荷易咨入聯合采揆讜材之不稱淹寵策以自陳
願寢誤恩少安公議而詔音垂喻人乏須承已冒服
於寵章方震慙於心術敢圖宗哲助穆邦猷列芳牘

以鋪芬借餘光而收飭庶緣外獎更激懦衷榮感叅
懷書言罔敘

代回皇族狀

近蒙恩制入服台聯嘗啟讓以報聞勉協恭而冒處
慮塵至化方惕危悚敢謂宗英首詒書指借褒言而
煥發助公論之僉宜榮感于茲文陳罔既

代謝前雨地狀

諫曹上列宰政崇聯併荷寵靈不勝恐懼切念某謏
才曲學蠢慮煩襟興于悴族之餘玷厥殊科之選薦
塵榮次取愧英游書命掖垣了無裨於國采慎辭鑿

署始有惕於官箴幸遭山藪之藏弗責斗箕之實獲
紓罪戾寢易歲時不謂台序乏員宸心慎舉首頒成
命猥及孤生尋昧死以自陳冀資賢而改擇曲煩聖
諭終廢危誠此蓋某官助穆公言序熙朝緯因爲容
之素定致延渥以繁臻然而三事陪榮萬機鈔訪協
承樞極非庸妄之所堪參佩韋莖或箴規之自勉益
圖勤止用副恩斯

代謝外任兩制狀

肅膺褒制外贊宰司祇荷寵靈交深感悸某本緣儒
服寢齒朝纓頃特從橐之華架蹈禁門之複曾無最

狀可報上恩不謂台序乏員宸私誤獎改諍曹之茂
秩躋政弼之崇聯省已甚明控朝希免曲煩聖諭終
廢危悰尋冒服於官成徒震慙於心術曷圖謙槩前
墜慶辭曲敦征彙之情陰禦煩言之誚永惟勗愛敢
怠銘藏清覲末期遙懷匪罄興言感遇抑假夙期尙
丐良箴以終前貺自餘感戢罔旣文陳

代回兩地狀

叨聯宰政尋布感悰雖趨附於星郵或未通於鈴史
敢謂某官曲敦夙契前墜書辭助恢則哲之猷陰禦
多言之畏波餘所逮夕惕差安屬私抱之已敷且費

詞之難再姑藏褒激庸識獎成

代求見書

四藩作牧疏封遠自於東周三署爲郎著位近從於
西漢蓋以奉當陽之瑞節煥列象之珠躔會玉建茅
遂荒於侯服薰衣起草彌縟於寵章矧上聖之撫期
酌遺文而播憲擇惟良之守出佩銀符興深詔之廉
入持荷橐洪惟慎柬篋絕常均苟非譽冠翹英才優
伏奏懿文潤吏振穆若之頌聲茂績揚庭負驍然之
刃地則何以高驤上路端遇休辰褰赤帷之裳英風
偃俗口雲臺之鼠清識造微將副疇咨必歸全德恭

惟某官隆名炳著淑問橫飛挺珪璋特達之姿稟松
栢後凋之操門施行馬敞立戟之舊扉家有賜書襲
傳經之洪胄而自垂蜺雲陞拖玉星藩風生廣漢之
才輻湊虞邱之略陪佳人於汾水夙侍賡歌諷子墨
於長楊屢承乙牘武帳詳延於體貌翠綏密邇於威
顏乃至盤錯求材銅鹽摧利派分毛舉無簿領之沈
迷粟腐錢流足縣官之仰給果注穆清之眷薦頒深
厚之條輟閩籍之凝巖樹方州之景式劭農興務從
龔遂之便宜鑄令移書用薛宣之條教薤疆盡擊棠
憩有餘固以轉嘉頌而上聞掩前修而高出賜金增

秩下綠詔以褒功書笏珥彤趨赤墀而建議發于碩
畫布在輿談矧某塊守常廬欽聞殊政陶潛三徑未
省於先疇楊子一廛早參於編戶雖復寢尋觴燼薰
灼緹油嘆遠壑以屢盈鋪上珍而未聘懷鉛就學曷
逃僮父之譏燥吻成書終抱壯夫之耻未卒課虛之
業遽鍾何怙之悲委昌志於當塗鬱隆思於雉節凋
年驟改散魄甫還故合削跡亨衢棲情故地琢蠹希
古與慢以相成抵几論交垂文而自見然念箕裘可
嗣堂構宛存瞻晏子之舊楹曠僚未幾泣范喬之遺
硯高矩尙新苟休否而靡傾慮不言而姑失將徵利

見用噬蒙亨幸遇某官敦篤道風勤求士類清言格
物伫越石之談賓右席臚歡誤當時之篡器是敢躬
陳爵里求覲表儀卜周璆下榻之知無趙壹倚門之
嘆雖高冠厚履慙非燕趙之奇而進牘抽毫願處鄒
枚之右將披符采預極怔忡

上潘郢州求見書

晉卿執手然明才止於一言韓牧寓書太白靡榮於
萬戶蓋以鋪聞介善逃聽休風肆嘉議以盈庭披粹
襟而嚮道伸於知己按油素以具存垂厥方來屬臚
流而有在敢緣斯義罄叙曲衷竊念某寶異荆璆利

非楚鐵采藍終日妄希一菊之盈削墮彌年未足三
冬之用幸以時丁魯變運偶堯稽搜屋壁之亡篇集
橋門之盛觀五尺童子耻王道之不談三事大夫美
人材之樂育外被鄉儒之化中勤辨志之功漸暨珥
文寢尋高矩充車聯駟雖力冀於論都毀瓦畫墁終
遠慙於食志尙念世襲相承之絨幼聞獨立之詩策
驚乘以載驅勵族庖而一割每至雪圍投簡月觀齊
章頌聖主之得賢王褒釋躡感儒林而作傳太史廢
書曷嘗不概見萬殊精浮八極辨國異家殊之政窮
王馳霸驚之原誠欲接充賦之珍羣當造庭之清問

景文宋公集 九
森羅三道振穆若之頌聲磅礴九流冠褒然之舉首
至於博求前載明練庶工論鹽鐵於縣官財成經制
繩春秋於臣下專傳舊章翼景化之猗那躋羣黎於
仁壽見諸行事是乃素心豈謂質以願違歲非我與
值所天之早世越散地以無圖塊若尸居窘同匏食
劉楨綿痼但議於竄身令伯私情永懷於終養僅成
齋志寧暇亢宗擲昌辭而翻類立言委秀句而真同
長物莊生晦迹惜樗散以難彫邢劭進身恐花狂而
自落永言孤遠益困沈冥儻勇退而自謀必倒行而
逞謂此者幸遇某官褰赤帷而蒞政紆文組以班春
泥札十行奉溫純於漢令吏衣三寸革舒緩於齊風
邑罕鳴桴里無喧鵲然猶盱衡獎善撤席登賢徵相
如未至之詞侈談靡倦設文舉不空之酒更僕居多
某是敢撰禮屨以祈通遶宮牆而請見雖滄溟甚廣
集乘鴈以非多而岱巘至高受纖塵而何讓儻或俯
矜莒陋靡間柴愚許親月旦之評俾覲山庭之表然
後叙長世字眈之術談經天緯地之文質以大中會
之前謀庶使深源雅議落孫盛之塵毛暴勝起迎偉
不疑之攝具將披符采彌積震遑

賈相公生日

景文宋公集
宗工挺生名世胥會肇休辰於秋律震佳應於崧神
恭惟某官百志昭明九德愷大以經術稽古用文律
緯天載誕甫期祝延增跂射蓬在戶已符經禮之占
芬菊稱觴共薦期頤之筆永輔王室常冠臣鄰某遠
宿官常阻陪賓慶詹祈所萃崖略罔宣

留守相公

遠守价藩坐違材館洪鈞播物久依陶育之餘假節
乘鄣仍在訓齊之末揆至和之馮厚擁諸福以便蕃
某官挺世自名與聖胥會輸至忠於王室建丕績於
宰司謀謨上前鼓舞天下留宮牡鑰聊均三事之獨
賢備冊贊書方企九功之圖舊朱暉順屆典謁方遙
伏冀上對倚毗慎調寢饋

回夏宣徽

祇膺獎冊出總中權視傳席之崇階冠徽庭之茂秩
寵靈優縟中外僉宜恭惟某官精力移忠壯猷經武
綢繆累聖參軫萬樞屬者戎候尙虞簡書微警逐羗
廬而護塞移成校以屯邊暫輟機臣往頒師律自天
而下聊示亞夫之行先計以聞式於營平之奏眷求
惟允欣賴方深敢冀哀謙遠煩占牘欽啟行之爲盛
顧懋賞以斯隆感慶叢懷名言罔喻

回韓侍郎謝加職

茂膺褒命進貼崇資伏惟慶慰恭惟某官誠本忠純
器包閎遠參幹機衡之重荐倚藩垣之行靜壹政條
妥安民極上心爲簡耆範有光亟升規殿之華移總
使符之劇河海之波并潤適寄老成股肱之郡召還
於階丞弼方深舞歎遽枉緘封味謙意之冲勞聳輿
情之欽偃永言欣戢倍越等夷

回楊州盛右丞

進肅臺機外觀藩政本緣樞宥之劇重爲哲艾之煩
逮此均勞允昭同體武經文緯聊資作憲之華袴頌
襦歌抑有報成之舊詎期鈞念遐况芳音敷感會之
餘言寫謙冲之深旨薦循雅論切寘勞悰茂氣方升
寬條適布願安和粹仰契眷懷

賀都尉王樞密

光奉制音入聯樞禁伏惟慶慰恭以某官忠由世濟
寵與時偕地聯右戚之華業總中軍之盛出藩倡治
趨節來朝屬邊燧之少勤藉籌帷之中覆亟僉舊德
參預繁機自成命之揚廷藹羣倫而動色尙聆徹奏
固執勞謙停嘉冊以彌辰墜芳銜而露悃矧惟虛席
已於告猷幸回崇讓之高時副欽鄰之望自餘欣感

併此懷銘

代回晏樞密讓

光膺制命聯總機廷伏惟慶慰恭以某官器采宏通
謀猷隱濟函天光於泰定服聖日於親逢治被寵靈
徧階華劇屬以邊書騰警樞省須才聿圖舊人升幹
中務文經武律參揉庶邦之和書訪夕思佐決萬機
之重敷求惟允僉論攸歸敢謂謙冲特詒誨問尚稽
朝渙顯露讓函况成命之已行諒素懷之無遂於聆
延拜併釋歡翹

代上兩府讓狀

樞帷決采宸宬僉疇過聽枵疎豫參機要恩靈踰次
震悸裝懷切念某學術匪優仕塗茲撫久塵禁職獲
奉帝暉姑效螢爝之餘罔裨金玉之度驗于已效奚
所取材不圖咨岳之求俾貳本兵之重內循諸已實
竦於多言上累而邦敢安於誤寵伏望某官憫其知
止惠以有終助推能哲之慈追罷惟行之命儻從至
讓是免疾顛悃悞既叢文陳奚喻

代回樞密王太博

顯奉制恩正司樞務伏惟慶慰恭以某官丞彝世烈
盟府茂勲參財坐幄之猷惠底垂橐之化四夷來享

景文忠公集 卷九
三
賴先計以周知三接同資服嘉謀之闡合成勞灼叙
異數進加蓋積歲以宜遷矧師言之率顛方欽藩獎
遽覩善辭諒謙槩之有光顧王言之既綽幸遵眷倚
時荷褒升欽祝感慙萃集誠府

回張副樞讓

光奉命書入參樞省伏惟慶慰恭以某官懿文經遠
茂德秉彝服在光華之辰居然王佐之器禁綸經櫛
冠瑞羽以爲儀裝錦直繩卓孤風而難進上心克厭
公論所宗實緣虛席之求進豫前帷之秘此焉亮采
副是疇咨遽窺尙讓之文猶鬱懋宮之投美言盈牘
姑誌於冲懷成命隨風難淹於盛禮願回介節卽順
徽章欽祝于中崖畧非敘

回夏宣徽

輟務中機憺威西畧抗戎旂而信邁按邊瑣以申嚴
臨幹不庭盡護諸將師興多務軍次參勞恭惟夙暮
之間昭介寤興之祉猥流鈞翰粉飾謙儀欽悅禮以
散風第藏心而戢感留屯訓武當二倚成行聞月捷
之傳歸總天樞之祕瞻懷企祝一二靡宣

景文宋公集卷第一百十九

景文宋公集卷第一百二十

啟狀

上河東轉運

上都摻別俄更上下之弦勞府事叢罕奉沈浮之訊
承便時而署政且馳遽以貽書占授悉周研覃有味
矧奉將明命經略奧區錯上賦以慎財邦資晉糴橫
大河而縱棹人記虞巡諒茲乘傳之行啟是富民之
拜願遵沖攝用副眷求感鏤傾祈度越倫等

渭州戴屯田

芬椒服譽素景於朝髦談樹宿官阻申於私見自辟

書之高選監近輔以陪京固有隔於等威矧敢交於
記奏斯者詎謂倅理郎中毀方求合稱物以謙因門
子之賓興謂胄筵之僚屬特煩下教罔愛優評九河
之潤沾餘頓祛鄙倍兩喜之言溢美奚所克堪願窮
褚以珍藏爲它年之恩紹秋辰適啟時訓是遵遡仙
表以在遙伏空函而奚狀

河南資政

護將王樞淹郵祠園幸及便時已終藏事自客轅之
暫稅煩使介之繼來申遣英僚就爲供具膠牽紛屬
果餌嗣霑嘉賜不停行人改觀雖重本朝之常體亦
緣舊物以致懷揆遇匪常撫衿奚報而還衡所迫詣
府莫諧擁朝節以亟趨僚台光而滋耿望遵冲衛增
父繁祺早正鴻鈞大庇彝品紳綏之願日月以勞

梁相公

藩侯職冗庸蜀地卑誠有恨於官儀難數通於私問
然結戀公府譬萬類之在鈞而布武賓階乏兩朝之
飛肉孤懷坐壅芳歲謾遷恭以大觀文相公學士道
含至和德包咸事光輔丕后懋熙庶工已成輔相之
宜遂去功名之地再更巨鎮聊倡四方惟克簡於上
心無不在於王室願總諸福普慰羣瞻矧舊物之未

捐荷如天之全覆其爲禱係自邁故常

代回樞密王太傅

需奏報聞詔音敦勸已揆惟良之旦式光往踐之規
善舉在茲僉言允穆伏况某官謀經王體武訓師和
著慎將之威名擁康侯之蕃錫內簽宥命時叙繁機
未滿歲以爲真本稽賞典惟其人而後備式寵臣鄰
榮誨首詒謙誠增慤顧寵靈而伊始積欣感以何言

江南轉運郎中

久伏民屢近還閨籍多難幽憂之後學殖寢荒平時
英俊之游書滕殆廢載懷高誼實耿離悰轉運郎中
望秀材林業偕賢運亟樹風於官次洽飪聽於聰謀
夙資郎署之賢外駕使輶之傳千艘銜尾大集於中
邦二節追鋒行階於上笏崢嶸歲晏壹鬱人遐願履
常休用紓遙款

知郡國博

齋航便道使閣班條荐煩記室之音垂曉通閩之舊
備聆順福允集素襟知郡國博風局精強材謀明劭
厯更煩使休有令聲對薦交於露封眷求簡於中展
永言劇部比邁薦瘥疇咨吏師撫我民瘵諒以暮年
賦政追西漢之惟良五袴騰謳與南風而同競顯躋

景文宋公集 三
治等歸服近僚願保粹真下符傾嚮影年行晚清晤
未期報義素深操觚非叙

魏府太傅

夙以下材久浮詔祿嚮福基之甚庫滯職署而罔遷
頃以綿章上庠使蔭因薄書之猥幾寘殿科稟符檄
之規偶逃敗事訖于終課復此還臺免三考之去幽
有二天而戴賜恭惟知府太傅道孚亮采聲揉列邦
均陝伯之東西闔儀克壯裂星街之南北戎索是疆
暫倚重於偃藩仁入膺於夢賚羣倫注聽介福大來
顧拱著以方初邈邈風而增歛神馳在遠思軋罔宣

薛叅政生日持禮

三階布象下儲名世之賢六矢在門聿記炳靈之旦
恭惟叅政侍郎順咨是采罔伏斯謀負敲鼎以和梅
坐巖廊而厚棟歲周慶育月叶清和共延祝於壽祺
益進階於皇揆有少微禮具列別封

陳州胡侍郎問候

淮陽近輔素倚於吏師河曲餘波久蒙於京室逖仰
褰帷之化善移值翮之風節宣有宜戩穀云嚮於九
重之圖舊參四近以宣猷揖晤未間傾瞻何極

攀違侍郎狀

克涓今日夙艤行艫順楚泐以揚舩彗淮雲而引旆
祖壺係出朝絨愴違某比屬緜痾阻陪餞禮銜恩惟
舊銷志無從願安遵渚之行彌保慎齋之訓永惟愧
戀罔及文陳

代鄭公回夏尚書

祇荷朝綸賜停機柄進肅天臺之務仍參殿廷之華
曠職五朞蒙恩一解榮非所望愧不容顏敢謂某官
敦操有筠推情悅栢絢書辭而垂慶助師錫以申褒
冀訂良箴益紓多悔接緒風而猶邈數感抱以奚殫
回狀元監丞

比自苦蓋投艱郊屢鏟蹟絕聞代事荐易歲筭祥紀
汔終迷魂來復早者亦承狀元監丞大孝奄鍾偏罰
歸伏倚廬內抑摧哀顧服調養某適當病力罔及聞
知洎得行路之傳已當踰月之外匍匐莫展慙震何
言月初秀才范君過訪蓬華伏蒙特垂矜誨曲亮庭
殘始罄述於孝思終惻發而收齒溝中木在詎稱於
繁文河上病同但均於哀款永言心照足厚民風切
聆鑄燧在勤羞膳無爽順變爲大惟疾其憂千萬支
持以副深祝

太尉

景文宋公集 五
近闕私憂甫寧病體久去外朝之著罕修執訊之儀
跡係民廛神馳義府恭惟太尉績宣金石忠貫天淵
總離衛以誰何訓善經而肅給百祥助順彌厚於福
基三接蕃恩永隆於邦翰孤平無似挺鑄攸依

座主侍郎書

數日前入侍郎坐伏蒙以汝陰詩筆一編俾之細覽
捧戴震汗罔識所宣亦既返窮庶隱危几振衣三薰
正冠一沐然後徐繹篇次寢求指歸曄乎其采也泐
乎其大也若洞庭之奏始聞而懼如章臺之觀三休
乃躋適然得肉以大嚼杳然御風以忘返飄飄凌雲

乃游天地間肅肅入宗廟但見禮樂器不足喻也甚
幸甚幸竊惟吟詠之作神明攸繫內導情性旁通謠
俗造端以諷天下之事變文以憂萬物之蘊音之急
緩隨政之上下大抵三百篇皆有謂爲之非徒爾耳
後雖體判五種時經三變音制彌婉體裁益緻以浮
聲切響相鎮以彫章縟采相矜然而大方之家往往
披華於沈宋之林收實乎曹王之囿窒其流宕歸之
雅正是以垂虹蜺騎日月而不爲怪礪泰山吞雲夢
而不爲廣矜螭首狀佩玉而不爲麗興蝸蟾比樸楸
而不爲煩道治世語幽國而不爲佞且怨靈均以來

景文宋公集 六
未有不覩斯奧而能垂名不朽者也自唐德有蕩人文寢微巷委其歌波扇成俗抗古者過堯以人猶狗今者襲魯而成魚訕怒則咄咄逼人幽憂則咕咕墮水適奇則驚離窮誤詬之索限扁則均折楊皇夸之謂衰微及國無聞焉耳至於幽人苾芻遁世長往短章悴句時時投曲然皆哇咬敲音局趣猿韻不足論也伏惟侍郎明公稟道至蹟爲人先覺慮含著蔡之告言埤金玉之度三人祕禁親逢聖期以席間談笑經大猷以筆端膚寸潤天下贊累盛之布度操斯文而主盟而乃念雅頌之淪軫風流之弊渡橘成枳衆

雌靡雄下垂百年者杳默遺響於是倡始多士作爲連章鉤深締情上薄於粹古促節入律下偶乎當世震枹鼓以竦介士運斗杓以準四時復而不厭茂而有間使味之栩然駭其理勝覽之亶然恐乎卷盡及夫盛氣注射英辭鼓動思泉流唇雲紙落手諸儒願喙長而不克誦小史懼腕廢而不及書此又精入于神不可得而聞也與夫討錦運之品詫簞袍之奪賦韻競病咬咀膏腴一何區區哉某被蒙憐獎擢廁榮伍不以鞭箠之使俾與杖履之游手探秘笥面命成矩導以真人之警咳灑其屯膏之鈍昏徒一孤生而

再受大賜其何況如之且慕有道者折角以効巾愛
太傅者掩鼻而成詠況其親接音旨密漱靈潤竊用
感發自忘頑愚謹亦搜次舊詩得五十首具藁贄獻
昔劉琨遺盧諶以二詩諶不能曉乃以常體酬報斯
文之族無乃類旃輕瀆宗工伏地俟罪

代與李舍人書

某夙以羈單天薄其祐年甫弱冠再銜怙恃之憂獨
與李氏某間關出處更相爲命僅荷遺構以及仕途
永念我先府君奄弃盛世藁竑都外霜沐露濡七見
閏月以時之不易久未厝安夙夜震懼心焉如隕乃

今卜於許之陽翟龜墨惟食將以冬十月克襄先妃
先君之葬某深惟古君子有夭爵道富高明令終者
則或傳于史官或銘于鼎彝或謚于攸司用能發聞
馨香以昭示來世後雖有不肖愚蒙之嗣猶賴先哲
自免於溝隍嗚呼若我先君官限于選條名壅於邦
聞儒林循吏之篇莫得采獲近古大夫不世祿家無
廟食考父孔悝之器莫知所施故事三品薨始得上
尙書以節一惠門生故吏之狀實隔彝制是三者皆
以位不配道禮從而污噫昔人有行高瑾瑜而名滅
煨燼者不可稱紀諒有憾於此邪今唯圓石勒銘尙

微品制之間後裔皆得序餘慶哀前烈勤咨當世之
彥炳辭騰實以光寵九京僕誠蠢頑擣昧無可比數
然世謀忠教尙能言之恭惟執事以正幾之才良直
之任紆褒爲袞敷言成春薦紳代家感資善述以信
陵谷之後爲無窮計是用忍抽裂之痛以髣髴茂芬
潛德泣狀官代粹爲一通敢私布于下執事重念孝
子之奉先也無美而稱之是誣有善而弗知不明知
而弗傳不仁如先君之純之邵也如彼僕之幸而知
之也如此願託沉刻以揚遺懿使小人之責免於不
仁不明之地齋志之憤見伸於冥冥之下非仁錫類
其疇圖之委素歸誠幸賜哀許

上許州呂相公書

竊聞古者堯有四伯是爲四嶽實佐文命降宅九州
帝庸嘉之故賜姓曰姜命氏曰呂在周宣時有申甫
者能左右王室係興周道國人美之爲作崧高之詩
道降神之異仲尼掇焉以什于雅在春秋時有齊許
者盟會糾慝幹不庭方以大承厥祀有祚在下史世
其家爲諸侯選由是言之呂姓之衍於申曼於許不
惟舊恭惟相公馮極天之峻秉蒸民之彝慶叢祥發
與聖參會言行而帝采亮謀奮而天緯和散爲九功

宣爲六德沛如淵回湛若陽休勵相丕后十有四祀
助薰燎而郊者四導農輅而東者一而鬼神無遺歆
戴斗之使歲通戎蠻之費月來而疆場無猜侮士之
賢者進無能者退邦之不足者與有餘者取而上下
無尤違三辰澄霄百穀靈野佑我不業格于皇天跡
夫感會之隆贊之幽協要可知已有大嶽基其兆有
申甫奕其先有齊許蕃其系靈光孫謀是相是鍾天
而未忘叔仲之德是故復申之字以陪敦章大卽許
之舊以濟美顯庸傳曰惟其有之是以似之公之謂
矣某不佞學於舊史氏言吉甫史克之作以事美一
時託文見志遂能聲滿天下于今稱誦不知自量謹
作嗣崧詩五章章十句美公復國于申也許康詩五
章章十二句美公之安乎許也立言之體略細語大
故推而上之以及於祖辭欲必類不容虛美故循而
下之復及於公古之賦詩義取卒章焉嗣崧之亂曰
素考是承士大夫之祝也許康之輯曰帝曰還歸邦
人之志也雖不足雍容揄揚其義肆而不隘輒因誕
日之慶繕寫馳獻侑奉觴之餘歡伏惟一加觀采裁
貸其罪

代張問謝解

玷斯士之髦宜從人廢署茂材之等輒以名聞撫才
表以自驚刻情涯而罔竄竊以斂材之重歷代尤難
漢則令計吏而常借優其續食唐則具鄉飲而申送
侑以少牢一再之適貢有差造秀之序升咸允若夫
王在之邑天下爲樞本英雄之所躔視郡國而爲首
挹公車之牘動或三千盛橋門之觀居然萬計國家
丕承聖職善述先猷炳乎人文重我王國乃至慎咨
朝彥謹司馬之辨材臨敕貢條俾新書而從事必先
所試冀得其真或內舉之致嫌許別頭而練實洪惟
典制高出古先諒非行比師儒譽推鄉曲敏以求於

方策遂際天人默而好於深沈周知統畧則何以言
詩後素用賦升堂一縱一橫析理而歸於正勿并勿
猥射策而著于篇自絜矩以不私膺錫朋而爲盛若
某者稟生疏闇累世羈平幼陶郁郁之風進服青青
之佩杏花菖葉早去先疇鐵撻韋編顓懷典學曩緣
方物之選獲參鄉老之書再試宗司率見呵於非是
覆求佔畢徒貽誚於無窮加以多難間纏病悰無賴
罷歸故里頗同馮衍之掃關循陟南陔姑奉詩人之
潔膳奚其爲政是亦素心頃聆深詔於四方內迫知
親之一懼臨博而企未能忘懷再鼓必衰猶期決勝

景文公集 十一
是用齋函鄉郵連襪國游會執事之避親當至公之
適可毫錐若綴銀紉如雲仰異試之謹嚴苦措辭之
澁訥逮終削柿遽迫銜山已忘之步與行自知將歸
旣償之軍語勇曷足論功方竣報聞卽謀藏密敢言
斷斷之技亦借濟濟之英擢自下流致之上列伏况
瞿圃僅存之士莫匪雅材中興第二之流綽存清議
遠茲忝冒愈集震慙此蓋某官簧鼓斯文朱丹至治
樂嘉魚之與共劭乃進賢軫函人之恐傷茲焉藏疾
因三物賓興之際恢四科進擢之規冰鑑之妍醜洞
分鐵炭之低昂無舛遂令庸懦亦齒題評敢不景止
前修倍勤往載九變貫而知選采翹本元一飛鳴而
及辰寢借寥廓庶伸尺寸上答獎成

安撫雜端

暫違省闕臨撫邊鄙持節戒嚴駐車問俗導下情之
抑鬱宣上意之丁寧易嘆爲歡化勞而抃顧屬韃之
列帥方負弩以趨風欣企所叢名言罔喻
回井代部署孟都使

序升近職移佐中軍成命有光羣言胥允恭惟某官
沉謀先事美闕映時外提雲壘之雄內董星藩之祕
果疇見効益峻榮階輟全魏之訓師奄太原而經武

殊鄰歛衽均萬里之干城諸校趨風重九天之下獎
適欽褒進遽枉緘滕載欽悅禮之賢第積裝懷之感
晤陪云遠企詠奚殫

賀廣信軍武六宅

寵正使名茂光戎轄守符未改邊瑣增雄某官英槩
自高沈謀克濟敵尙素愾鬻勇於餘積閱有歲月之
淹薦賢交奏章之密果從聖柬進服恩褒列帥慰以
相歡中軍倚而增重攝符無狀卽席是資竊抃餘音
回符久禱

回提刑

光膺茂渥貳案祥刑差命便時卽親治職某官守兼
文武識照幾微雖從上食之優式結帝宸之顧大河
而北庶獄號繁允光命擇之嚴自寄澄清之本得人
爲盛先令有孚惟此屬州克依餘庇載言欣躍曷罄
文陳

判府尙書啟

表海報成坐躋樂國申析分理進守留京幕府旣開
彼都何幸恭惟尙書明謨熙綽俊德愜元荐幹機樞
彌奮忠力而自均國勞任煬天至和靈龜在忠喻馬
忘累雖復勉班春而振乏大庇物於屢豐出乃緒餘

同人憂樂賞圖尤異聊襲冕以露華地直鬱葱果錫
□□□□惟泰守之先定非外物之屢遷今茲偃藩

原本下佚

文刺

景文宋公集卷第一百二十

